

14 MAY 2003

MAHATHIR:UMAT ISLAM BOLEH MAJU SETANDING BANGSA LAIN

KUALA LUMPUR, 14 Mei (Bernama) -- Datuk Seri Dr Mahathir Mohamad berkata umat Islam boleh maju setanding dengan bangsa lain, bahkan lebih maju, jika umat mereka berusaha bersungguh-sungguh dengan mengamalkan ajaran Islam sebenar seperti yang dituntut oleh Al-Quran dan Sunnah Nabi.

"Islam yang dibawa oleh Nabi Muhamad SAW ini penuh dengan hidayah, dan petunjuk untuk kehidupan," kata Perdana Menteri dalam buku cenderamata sempena sambutan Maulidur Rasul peringkat Kebangsaan 1424H.

Sambutan Maulidur Rasul yang diadakan di Stadium Putra, Kompleks Sukan Bukit Jalil di sini dirasmikan oleh Yang di-Pertuan Agong Tuanku Syed Sirajuddin Syed Putra Jamalullail.

Dr Mahathir berkata sambutan Maulidur Rasul mempunyai erti yang besar kepada umat Islam kerana ia bukan sahaja mengimbau kembali ingatan terhadap sejarah hidup Rasulullah malahan memberi kesedaran dan keinsafan kepada umat Islam untuk lebih berazam dalam menghayati agama Islam dan mengamalkan ajarannya.

Beliau berkata Islam adalah agama yang benar, sesuai sepanjang zaman dan golongan manusia, seharusnya mampu difahami dan diamalkan oleh umat Islam dengan sebaik-baiknya dalam apa jua keadaan dan masa.

Melalui penghayatan Islam dengan betul dan bersungguh-sungguh, umat Islam akan lebih insaf dalam memenuhi tuntutan agama, lebih berusaha, rajin menimba ilmu, sentiasa meningkatkan ketahanan diri dan mampu mempamerkan keindahan dalam kehidupan seharian, katanya.

Sambutan yang bertemakan "Bersama Hayati Keindahan Islam" dihadiri lebih 10,000 orang yang terdiri dari wakil-wakil Kementerian, agensi-agensi kerajaan, institusi pengajian tinggi awam, badan korporat, institusi perbankan dan badan bukan kerajaan.

-- BERNAMA

FA HS PR